

Rapport dil Cussegl Pastoral

Strusch da crer. Gia in onn ei vargaus ed jeu stun cheu avon in fegl vit per sciver miu rapport sco presidenta dil cussegl pastoral. Enteifer quei temps ei bein buca curriu e passau ton sco ils davos onns e tuttina intec activs essan nus tuttina stai:

La grupp la pli activa ei la grupp liturgica stada. Nus vein enteifer quei onn preparau sis survetschs divins dil plaid. En mintga pleiv ha ei dau bials muments e bialas sentupadas. Tgei fuss nossa cuminonza senza gidonters? Nos gidonters e gidontras han menau atras las devoziuns da matg ed october e las vias dalla crusch. Engraziel fetg per quei survetsch a Luregn Carigiet, Ida Berther ed Annamaria Albrecht e tut ils lecturs da nossas pleivs. Igl Advent ed il temps da Nadal han dau intec dapli lavur. L'entschatta ha Sontgaclau dau cun far viseta en baselgia a tuts presents. Silsuenter eis ei stau in bi mirar co nos premcommunicants han giugau in giug da Nadal durant la messa da famiglia da Nadalnotg. Igl ei adina bi cu pign e grond, giuven e vegl s'engaschan ed igl ei stau plascheivel che l'iniziativa ei vegnida dallas mummas dils premcommunicants. Aschia eis ei in bi luvrar ensemen.

Quei vala era per nies usit da retgs. Per che tut gartegi drovi bia mauns che porschan agid. Uonn han ils affons finalmein astgau cantar. En duas pleivs havein nus adattau igl usit. Sco gia si Breil han ils retgs cantau en baselgia ed en plirs loghens e quartiers dil vitg. Quei ei stau ina nova experienza che ha menau a bialas sentupadas denter ils convischins. Quella fuorma lein era mantener egl avegnir.

El decuors dil fevrer havein nus giu sesida e deplorablamein dau adia a Patricia Herger, Rezia Derungs e nossa gidontra Flurina Candinas. Plascheivlamein vein nus duas novas gidontras Paula Friberg e Nicole Allensbach. Ellas dattan sustegn ad Andrea Hitz surtut era culs usits es aperitivs a Danis.

Nies di da brunch ei stau la davos'acziun avon radunonza. En in survetsch divin da famiglia essan nus semussai solidarics culs carstgauns dall'Ucraina. En in mument da silenzi vein nus, pign e grond erregiu ina tuor da speranza e tschentau ina candeila da pasch enamiez. Silsuenter astga il solver buca muncar. La finamira dalla grupp diaconia ei da dar la pusseivladad als scolars da saver far experienzas cul segidar. Segidar cun carstgauns che ein en miseria. Aschia han plirs scolars segidau. Tgi davontier cun preparar e survir il solver e tgi davos las culissas cun metter en teppis e meisas, decorar las meisas ed aunc auter.

En mintga cuminonza drovi gidonters e glieud che surpren responsablidad. Era ina pleiv consista buca mo dil baghetg baselgia. Ella ei bia dapli - nus tuts formein baselgia. En quels muments nua che pign e grond segida viva e flurescha nossa cuminonza intec dapli.

Perquei in engraziel fetg a tuts che segidan, magari e tut el zuppau.

